



CONFERENCE EPISCOPALE DU RWANDA

Secrétariat Général

B.P. 357 Kigali / Rwanda

Tél. : (+250) 252 575 439

E-mail : eglisecatholiquerwanda@gmail.com

UBUTUMWA BUGENEWE ABAKRISTU KU MUNSI MUKURU W'ABAKATESHISITI KU WA 25 GICURASI 2025

INSANGANYAMATSIKO:

"ABAKATESHISITI TURANGAMIYE KRISTU SOKO Y'AMIZERO,
UBUVANDIMWE N'AMAHORO



Kuri iki cyumweru cya Gatandatu cya Pasika

Turazirikana ku masomo atugaragariza umugambi w'Imana ku bantu

Mu muryango w'Imana kuva mu ntangiriro hamye hariho abatumwa kugirango amakoraniro atayoba cyangwa agatatana

Kuri iki cyumweru Kiliziya yo mu Rwanda irahimbaza ku ncuro ya kane umunsi w'umukateshisiti .

Insangamatsiko iragira iti:

I. "ABAKATESHISITI TURANGAMIYE KRISTU SOKO Y'AMIZERO, UBUVANDIMWE N'AMAHORO



Iyi nsangamatsiko iragaragaza ko umukateshisiti ahora arangamiye Kristu, We umubereye isoko y'amizero, ubuvandimwe n'amahoro, mu butumwa yahawe muri Kiliziya.

Muri iyi Yubile y'impurirane y'imyaka 2025 y'ugucungurwa kwa Muntu na 125 Inkuru nziza igeze iwacu mu Rwanda, uyu munsu turashimira abagize uruhare kugirango Inkuru nziza yamamare mu Rwanda, muri abo bitangiye inkuru nziza, turazirikana uruhare rukomeye rw'abakateshisiti batabarika bitanze kugirango abanyarwanda bamenye Imana.

Yezu Kristu ni isoko y'amahoro. Amahoro nyayo asobanura ituze rishingiye ku mubano mwiza hagati y'Imana n'abantu no hagati y'abantu ubwabo. Amahoro nk'ayo, ni yo Yezu Kristu atanga. Koko rero, ijambo rya mbere Yezu yabwiye abigishwa be nyuma yo kuzuka mu bapfuye, ni amahoro. Yagize ati: "Nimugire amahoro" (Yh 20,19). Ayo mahoro abayahawe bagomba kuyasigasira barangamira Kristu, bagororokera Imana kandi bihatira kubanira neza bagenzi babo bese basangiye ugucungurwa.

II. UBUTUMWA BW'UMUKATESHISITI

Mu buryo bw'ingenzi Kiliziya ikoresha yamamaza Inkuru Nziza, ubwigishwa bufite umwanya ukomeye kandi w'ibanze. Mu bwigishwa niho umukateshisiti yuzurizamo ubutumwa akesha Batisimu yahawe.

Mu butumwa bwe afasha abigishwa guhura na Kristu, bityo bakemera guhinduka, gukura mu kwemera kandi bakizirika kuri Kristu. Ibyo bibageza kuri Batisimu, ituma bapfana na WE bakazukana Na WE.

Umukateshisiti niwe utoza abigishwa kwinjira mu butumwa bwa Kiliziya, bwuzurizwa mu miryango bavukamo, mu miryango ya agisiyo Gatolika, mu miryango remezo n'izindi nzira zose Kiliziya ikoresha mu gutagatifuza umuryango wayo.

Umurimo wo kwigisha ushinzwe mbere na mbere Abepisikopi, Ni bo «*Bakateshisti b'ikirenga*». Kwigisha bishinzwe kandi abapadiri nk'abafasha b'ibanze b'Abepisikopi. Uwo murimo wo gutoza abandi ukwemera no kubahishurira amabanga y'Imana, ushinzwe ku buryo bw'umwihariko ababyeyi, bo barezi b'ibanze b'ukwemera kw'abana babo. Ariko kandi uwabatijwe wese, Isakaramentu rya Batisimu rimuha kugira uruhare ku ***Busaserdoti bwa Kristu, We Musaserdoti, Umuhanuzi n'Umwami***. Buri mukristu wese rero afite inshingano yo kwamamaza Inkuru Nziza mu mibereho ye yose mu mvugo ndetse no mu ngiro, arangwa n'imigenzo myiza ishingiyeye ku Ivanjili.



Ku buryo bw'umwihariko, hari Abalayiki bitangira uwo murimo wo kwigisha Inkuru Nziza nk'umuhamagararo wabo wihariye muri Kiliziya, abo ni abakateshisiti.

Nubwo ubwo butumwa budusaba kwitanga tutizigamye, byaba ari ukwibeshya kubufata nk'igikorwa cy'ubutwari buhambaye bwa muntu, kuko mbere ya byose igikorwa ari icya Yezu, ni We «*Mwogezabutumwa w'ibanze kandi usumba bose*».

Ubwo butumwa bushingiye kuri Kristu ubwe, We mwogezabutumwa w'ibanze kandi w'ikirenga. Yaduhishuriye ko ari We ibyanditswe n'ubuhanuzi byuzuriyemo aho agira ati «*Roho wa Nyagasani arantwikiriye, kuko yantoye akansiga amavuta, agira ngo ngeze Inkuru Nziza ku bakene, ntangarize imbohe ko zibohowe, n'impumyi ko zihumutse, n'abapfukiranwaga ko babohowe, kandi namamaze umwaka w'Impuhwe za Nyagasani*» (Lk 4,18-19)

Mu buryo bwose bwo kwamamaza Ivanjili, umwanya w'ibanze uhabwa iteka Imana yashatse kuduhamagarira gufatanya na Yo, tukanabishobozwa n'imbaraga za Roho Mutagatifu.

Bakristu bavandimwe turabashishikariza kwitabira ubwo butumwa bukomeye muri Kiliziya, ibyo bigahera iwanyu mu miryango, mukabera abana banyu abakateshisiti beza, bityo mukarangiza ubutumwa bwo kurerera Imana n'igihugu, umubyeyi niwe mukateshisiti w'ibanze mu burere gikristu bw'umwana.

III.

GUSOHOZA UBUTUMWA BWA KRISTU MURI KILIZIYA YE

Ba kateshisitu dukunda

Mukomeze kwigiramo ibakwe ryo gusohoka musanga abantu ngo mubamenyeshe Inkuru Nziza ya Yezu Kristu, maze uko Yezu Kristu agira ati «*Nimugende mwigishe amahanga yose, mubabatize ku izina ry'Imana Data na Mwana na Roho Mutagatifu, mubatoze gukurikiza ibyo nabategetse byose*».

(Mt 28, 19), bibongerere ibyishimo mu kumwamamaza mu mvugo no mu ngiro.

Mukomeze kurangamira umuvugizi w'abakateshisiti Mutagatifu **Andereya KAGGWA**, wemeye guhara amagara ye kubera Yezu Kristu n'Ivanjili.

Namwe muhuze ukwemera kwanyu n'ubuzima bwa buri munsu kandi mubitoze n'abandi kugeza aho mwahara amagara yanyu kubera kogeza Ingoma ya Kristu muri bagenzi banyu.



ISENGESHO RYO GUSABIRA ABAKATESHISITI

Nyagasani Yezu Kristu,

Wowe washatse ko muri Kiliziya yawe habamo abakateshisiti bo gufasha abantu kukumenya no kukuyoboka, ubahe ubutwari n'ubwitange bakeneye mu kogeza Ingoma yawe. Nk'uko wadukunze, ukatwizera maze ukaduha ubutumwa, duhe ubuhanga n'ubutwari byo kukubera abahamya muri iyi si ya none, mu mvugo, mu ngiro no mu mibereho yacu ya buri munsu. Nk'uko wakoreye mu bahowe izina ryawe b'i Bugande barimo Andereya KAGGWA Umuvugizi w'abakateshisiti ukihesha ikuzo, natwe duhe ukwemera gushyitse kwatuma duhara ubuzima bwacu kubera wowe. Tubisabye twizeye ku bwa Yezu Kristu Umwami wacu.
Amina

Musenyeri Jean Bosco NTAGUNGIRA
Umushumba wa Diyosezi ya Butare
Akaba na Perezida wa Komisiyo ya Kateshezi
mu Nama y'Abepisikopi Gatolika mu Rwanda

